

Naalakkersuisunit UA12-mi suliarineqaqqullugu Inatsisartunut aalajangiiffigeqqullugu siunnersuut, nassuiaasiortoqassasoq inuusuttut 25-it inorlugit ukiullit qanoq amerlatigisut ullumikkut ilinniaqalernissamut suliffeqalernissamulluunniit piareersimanginnerat pillugu. Tamatuma saniatigut inuusuttut uninngaannalernissamut aalerinaateqartunut Piareersarfiup ataani suliniutigineqartunut aaqqissuussaasumik siunnerfilimmillu ilanngunneqarsinnaaneranut periarfissat nassuiaammi misissorneqassasut.
(Inatsisartuni ilaasorta, Akitsinguaq Olsen, Siumut)

Akissuteqaat

(Inuusutissarsiornermut Aatsitassanullu Naalakkersuisoq)

Siullermeerneqarnera

Naalakkersuisoq matumuuna inuusuttut 25-t inorlugit ukioqartut qassit ullumikkut ilinniartitaanissaminnut suliffeqarnissaminnulluunniit piareersimanginnerat nalunaarsuisioneqarnissaannik siunnersuut taperserpa.

2012-imi jan.-p aallaqqaataani, sulisinnaassuseq aallaavigalugu naleqqusaanermik periusiliorneq kommuunit suliffissarsiuussisarfiini aallarteqqammerpoq, suliffeqanngitsunillu nalunaarsuinerup massakut inuit 25-t inorlugit ukioqartut qassit ullumikkut ilinniartitaanissaminnut suliffeqarnissaminnulluunniit piareersimanginnerat nalunaarsornissaat pisinnaasunngortippaa.

Kisianni kisitsisit ullumikkut eqqoqqissaarsinnaanerit nalorninartoqarpoq, illoqarfiit nunaqarfiillu ilaannaasa suliffissaqanngitsut nalunaarsortarmatigit immikkoortitertarlugillu. Kommunilli paasititsissutigaaq suliffeqanngitsunik sulisinnaassuseq aallaavigalugu naleqqusaanertik kingusinnerpaamik 1. juni 2012 naammassereersimassallugu.

Inuit pisortanit ikiorsiissutinik pissarsitinneqarsimangitsut, assersuutigalugu inuusuttut 18-it inorlugit ukiullit paasisaqafigilluarniarnerat ajornakusoornerusarpoq.

Nunatsinni Piareersarfinni aamma Naalakkersuisuniit Inuusuttut 25-t inorlugit ukioqartut aallartitinniarlugit ilinniagaqalersinniarlugilluunniit suliffeqalersinniarlugit sulissuteqarfigineqarnerat tamaviaarunneqartorujussuuvoq. Centerini pisortat Piareersarfiit pillugit ukioq manna martsip naalernerani ataatsimeeqqammerneranni suliassamik qulaanni taaneqartumut ikiuutaasussamik siunnerfeqarluni iliuuserineqartussanik aallartitsinissaq pillugu iliuusissaliortoqarpoq.

Taamaattumik siunnersuutigineqartoq Naalakkersuisut tapersorsorlugu ilassilluarpaat, qilanaaralugulu 2012-imi ukiakut katersuunnermi inuusuttut 25-t inorlugit ukioqartut qassit ullumikkut ilinniartitaanissaminnut suliffeqarnissaminnulluunniit piareersimanginnerat pillugit nalunaarusiap saqqummiunnissaa.

Nalunaarusiap eqqartussavaattaaq piareersarluakkamik siunnerfeqarluartumillu qulaani pineqartunut maanna siunissamullu iliuuserilersaakkat suutinniarneqarnerat.

Naalakkersuisut siunnersuutip akuerineqarnissaa inassutigaaq.